

Ufficio Stampa della Provincia autonoma di Trento

Piazza Dante 15, 38122 Trento

Tel. 0461 494614 - Fax 0461 494615

uff.stampa@provincia.tn.it

COMUNICATO n. 882 del 13/04/2025

Manà fora su Trentino Tv l program l vegn endrezà dal Comun General de Fascia

“Pedies”: vegn fora la puntata #481 del program ladin per la televizion

Ence chesta setemèna l é a la leta l nef apuntament de “Pedies”, rotocalch ladin de informazion, ruà a la puntata nr. 481.

I argomenc de chesta setemèna l é:

L campion de schi Stefano Gross l à serà su sia carriera agonistica. Do 20 egn passé co la squadra nazionèla, 165 garejèdes te copa del mond olache per 12 outes l è ruà sul podie; do 9 podies de Copa Europa e 5 medaes de or ai campionac taliegn, Gross l lascia su co la garejèdes de copa del mond de schi. La redazion de Pedies la ge à dedicà na bela intervista olache l conta de sia esperienzes sportives, di bie suzesc e ence de vèlch delujion e olache l saluta de cher duc i tifosi che i ge è stac apede te chisc egn.

L’Azienda per l Turism de Fascia, ai 3 de oril passà, l’ à metù a jir na scontrèda publica per portèr dant l projet GSTC: Global sustainable Tourism Council. Se trata de n recognosciment internazionèl emportant olache vegn pervedù de arjonjer cerc livie de standard de sostegnibilità en relazion al contest sozio-economich, culturèl, ambientèl e de governance. L’APT l’ à desidù de meter a jir chest percors col tor ite raprezentanc istituzionèi, imprenditores e operadores locai per aer n confront partezipà.

Na rezeta da d’aisciuda per la domenia de Pèscà. L chef Nicola Pellegrin del Hotel Al Lago da Soraga l ne met dant na rezeta scempia e gustégola per n piat fat con prodoc locai desche: polenta, formai de mèlga, speck e spèrjes. No menciàrà vèlch curiosità per fèr amò più bona chesta speisa.

I report de chesta setemèna, enjigné da Riccardo Zanoner, Sabrina Riz e Angela Pederiva, i vegn porté dant co la ousc de Riccardo Zanoner.

Metù a jir col sostegn del Comun General de Fascia, de la Provinzia autonoma de Trent e de la Region autonoma Trentin – Südtirol, “Pedies” l va fora su Trentino Tv – canal 10 de TN- vigni sabeda da les 18.00 (sie da sera), de domenia da les 13.30 (mesa la does domesdi) e de lunesc da les 11.30 (mesa les doudesc). L program ades l va fora ence sun AltoAdige TV – canal 11 de BZ - vigni domenia da les 18.00 (sie da sera).

Se pel veder duta la puntates ence sul canal YouTube de TV Ladina sot chest link:

<https://www.youtube.com/@TvLadina>

opuramenter se pel veder i servijes un a un su la piata Facebook de TV Ladina.

<https://www.facebook.com/TelevizionLadina>

(us)